



Bärner Fasnacht 2006

Äs git Sache, die wiederhole sich, si nid nöi.
So öppe die gschörte Löhn vo dene Mänägersöi.
Jahr für Jahr ghöre mir di gliche Schweinereie.
Drum dörfe mir o wieder ufträte vor öine Reihe!
Müsst dir no äs Bischspil ha?
Ja,ja... mir föh ja jtz grad a.

All Jahr geit das Gschtürm um ds WEF wieder los.
Mir chöis bald nüm ghöre, das Gliir um Davos.
Pointe suechsch bi dene Gäldseck vergäbe.
Nid e mal Frou Jolie cha da üsi Stimmig häbe.
Für d Mönsche rächt ä schöni Frou?
Interessiere tuet das eh ke Sou.

Um ds Wasser gits in Bärn gäng wieder Krach.
Ob Hochwasserschutz oder dr offnig Bach.
Üs tuet dä Bach ganz üs bsungris gfalle.
Inegheie, für immer wäg: grad rächt für ne Wasserfalle.

Fasch i Form isch üsi Schinati hür.
Die paar Medaille sy de nid grad e Kür.
Zum Fasch-Gwinne fählt ihne dä Ma mit Pfus.
Mit „knapp verby“ kennt sech nämlech dr vo Grafferied us!

64 statt 10 Millione für äs paar Goal u blutli Wade.
Da geit üsem Stapi also grächtem dr Lade abe.
Gnauer zämezelle chöi mir z Bärn zum Glück de scho.
Süsich wär nämlech d Frou Rytz nid i Gmeindrat inecho.

Äs wird gwurschtet und es fetts Söili gschlachtet.
Nach feine Schinkli u nach Späck wird da trachtet.
Der Brate schmöckt me scho dür ds ganze Land.
Für d Swisscommetzget mache sie gärn die hohli Hand.

Ds Bärn am Bahnhof hets ä riese Volksuflauf.
Ischs ächt ä Demo gäge Sunntigsverchouf?
Äuä! Demonstriere isch chum ihres Hobby.
Die wei nume Tickets für dä geil Siech Robbie.
Wosch die Junge mobilisiere,
muesch dr Robbie la politisiere!



Bärner Fasnacht 2006

Pisa - Kampf der Kantone tönts dür ds ganze Land
Teschtet wird ds Gedächtnis, d'Intelligänz u dr Verstand
Im Fernseh und o im Radio ghört me di intelligänte Lüt
In Reconvilier nütze mir die Kompetänze nüt!

Äs git Lüt, die hei gärn chly masochistisch weh.
Vo dere Sorte isch üsi Bärner SVP.
Rietschuel-Abstimmige, finge die gar nicht hohl.
Uf ds Dach becho tuet drum dene äüä wohl.

Faxe ume schicke isch äs Risiko
Gheimi Infos chöi eim da z Ohre cho.
Drum pass uf, wie d kommuniziersch ir Not.
Süsich weiss dr Bundesrat: "Schatz. Ig bringe de no äs Brot."

Scharfi Hüng gits mit zwöi u vierne Bei.
I ds Tierheim mit ne. Üs fröits das scho ä chlei.
Uf dr Strass bisch sicher und Platz gits no drüberus.
Rechts vor Mitti im Bärner Bundeshuus.

Ganz schön tierisch geits hür zu und här
Vogelgrippe, Kampfhüng u was chunt nähre?
Äs isch ganz eifach – was rimt sech uf Ferkel?
Dir wüsset was chunt – ä Frou namens Merkel!

Bim Baldachin chöme sich d Jurischte ids Gheg.
Si zange um d Volksmeinig und um Denkmalpflieg.
Bouet das Dach - Bärn wott schliesslech gross sy.
De guub's ändlech Schärme für Bärns Obdachlosi.

„Ab hier beginnt der rauchfreie Bahnhof“.
das cha me luschtig finge oder o doof.
Zum Glück muess dr Roucher nid allzu fescht lyde.
Dr Entzug chasch mit Finstoub ganz guet vermyde.

Äs dürschtet em Blocher nach Ufmerksamkeit.
Nach Liebi, nach Nöchi u nach Zärtlechkeit.
Är würdi gliebt, garantiert meh aus gnue.
Würed är ändlech ufhöre so soudoof z' tue.